



PM mahu agensi kerajaan berkongsi kepakaran bidang ICT

Oleh Mohd Iskandar Ibrahim - November 7, 2023 @ 10:38am
mohd_iskandar@bh.com.my

PUTRAJAYA: Datuk Seri Anwar Ibrahim meminta agensi kerajaan yang memiliki pakar dalam teknologi maklumat dan komunikasi (ICT) supaya berkongsi kepakaran dengan jabatan lain bagi menjamin produktiviti sektor awam.

Perdana Menteri berkata, perkongsian itu penting kerana bidang ICT semakin mencabar dan luar biasa yang memerlukan perubahan dilaksanakan.

"Saya berbincang dengan Pengerusi Petronas dan Gabenor Bank Negara, semalam dan saya minta supaya kepakaran itu dimanfaatkan oleh semua jabatan.

"Kita mohon Unit Pemodenan Tadbiran Dan Perancangan Pengurusan Malaysia (MAMPU) dapat membuat keputusan muktamad (berkaitan isu ICT) supaya tidak berlaku pembaziran," katanya.

Beliau berkata demikian ketika berucap pada Majlis Perhimpunan Warga Kementerian Kewangan Bersama Perdana Menteri di sini, hari ini.

Yang turut hadir, kedua-dua Timbalan Menteri Kewangan iaitu Datuk Seri Ahmad Maslan dan Steven Sim serta Ketua Setiausaha Perbendaharaan, Datuk Johan Mahmood Merican.

Anwar berkata, perkongsian kepakaran itu juga sejajar dengan inisiatif kerajaan mempertingkatkan kepakaran serta kemahiran dalam bidang ICT di negara ini.

"Ini soal transformasi digital, peralihan tenaga, pelan hala tuju industri baharu dan ini semua memerlukan (kita) menggapai sesuatu yang tinggi.

"Tetapi dalam menggapai langit, jangan kita lupa untuk berakar di bumi kerana kita juga harus fikir masalah asas rakyat seperti harga barang, tandas sekolah dan jalan berlubang," katanya.